

得之傳於下世勿輕其文信受奉行斷死續生吾於曜靈七萬年復與於此演說玄極是時
老君垂示畢寂無遺聲若有若無不知所在天師受之傳於世矣

太上說西斗記名護身妙經

太上說中斗大魁保命妙經
爾時泰清境太上老君於水壽年中與正一張天師屢慶會於蜀都以西斗靈文授之以其能修謹奉行於是
太上老君復現金身於清虛中升玉局座敷宣正教而又垂言金鉞前戮巨天後刑降伏魔魁孰敢不從執錄把符玉女金童延生保命乘雲馭風生身受鍊度世無窮
老君是時乃宣呪曰
惟彼中央 總領四方 提攝萬象 超卓紀綱
彰善罰惡 琅函玉章 漂落萬鬼 摧折鋒鋦
度世無量 名昭彼蒼 供奉尊禮 掃除不祥
志心奉受 昇天翱翔 急急如律令
中斗第一赫靈度世真君
中斗第二幹化上聖真君
中斗第三冲和至德真君
太上曰凡人持誦是經切須齋心虔禮叩頭閉目一念存神人遊壘廡相見滿度救世延生能消除殃業滌蕩妖氛劫劫長存流行無

疆
太上曰惟有中斗位居五天之中四方拱衛尊大無極主天元炁統領諸天妙文洞章天人所寶吾今告戒丁寧用傳下世濟度群迷為世津梁傳非其人若生忽慢天眞不許繼世被殃吾念汝能洗心澄慮嚴潔崇奉孜孜不倦終始一節確守素志可不為汝敷陳叙說此中斗與章正一天師乃稽首作禮諦聽敬受
老君告正一天師曰惟彼宵蒼位處中央端居靜密開列混茫四極輔翼大赫丕光七政璇璣兩曜伏襄純攝萬象提振紀綱嚴校諸天無極神卿三官九署十二河源二十八宿三十二天普得擁護降福無殃彌除罪簿落滅惡根東斗主算西斗記名北斗落死南斗上生中斗大魁巍然至尊天人受度曠劫長存三塗五苦八難三逆承茲正教升入金門老君謂正一天師曰中斗之炁生於四斗成始成終造化之源青帝護魂白帝侍魄赤帝養炁黑帝通血黃帝中主萬神無越青天魔

王已元醜伯赤天魔王負天擔石白天魔王
 返山六目黑天魔王豎醜朗觀黃天魔王橫
 天擔力五帝大魔萬神之宗總領鬼兵退除
 群兇種種實仗嚴駕斐龍驅雷掣電周遊太
 空金鏡前戮四極歸真高尊之像冲靈帝君
 至真大聖端拱圖列精神存想懇禱心願如
 得監度延福延生但依經法嚴奉供養於有
 災之日或於本命之日或於三元八會之辰
 鋪設淨壇以時果名花寶香供養宣告科儀
 清淨身心啓請真聖醮謝罪業真聖歡喜益
 算延年無願不從九祖生天名籍仙都逍遙
 上清

老君告正一天師曰五方所秘靈音吾昔傳
 於下世濟度衆生永離沉淪為世之寶功莫
 大焉

老君復告正一天師曰五斗符相靈文五斗
 真君名號宿有道緣方得值遇供養專禮威
 烈靈驗善惡災祥應猶影響切在專心無得
 輕慢汝宜確守精專敬之戒之勿忘宣布
 老君付囑訖乃昇天而去天師頂禮拜謝傳

之於世藏之全匯化度無窮矣

太上說中斗大魁保命妙經



太上說中斗大魁掌算伏魔神呪經

老君曰大道無形常居杳冥聖中之聖靈中
 之靈包羅無數含養衆生是以有情者稟識
 性者通達之者死順之者生子欲超升上界
 不入幽冥至意齋心且暮誦經誦之百遍魂
 魄安寧誦之千遍龍神衛形誦之萬遍伏滅
 邪精所願皆得所作皆成降伏惡鬼束縛妖
 靈見我者死聞我者驚慢我者滅敬我者生
 誦之萬遍神通自在舉身皆輕所求如意得
 駕雲軒朝拜天地位列仙官子孫獲福門戶
 興榮世俗弟子若能諦聽吾不誑汝但發精
 誠若居郊野或值刀兵或遇災橫之中或陷
 圍閉之域或逢虎狼蟲蛇或遭惡鬼妖精一
 切恐怖但誦吾經不得高念勿令出聲清淨
 齋心至意存誠吾降神兵立消災禍自得福
 生一切神名急呼者應十萬天師續命十萬
 真人注生十萬金童守魂十萬玉女衛形十
 萬天丁喫鬼十萬力士吞精十萬將軍斬妖
 十萬金剛縛邪十萬龍王大怒雷公掣電交
 橫所逢者吞不問姓名揚波閉日山嶽縱橫